

Schwarz-Schilling: Odgovornost domaćih organa ključ za trajnu stabilnost



Ured visokog predstavnika treba da ostane otvoren još jednu godinu kako bi dalje vodio proces reformi u Bosni i Hercegovini, piše visoki predstavnik i specijalni predstavnik EU Christian Schwarz-Schilling u novinskom članku koji je objavljen danas i dodaje da međunarodna zajednica treba i dalje da djeluje u skladu sa principima odgovornosti domaćih organa.

U vrijeme kada se nazirao kraj daytonskog mandata, međunarodna zajednica je smatrala da je tokom prethodne godine bilo važno usvojiti “manje intervencionističku politiku”, piše Christian Schwarz-Schilling u svojstvu gostujućeg komentatora u njemačkom dnevniku *Die Welt*. Iako u protekloj godini nisu ostvareni svi ciljevi, koncept domaće odgovornosti predstavlja ključ za osiguranje trajne stabilnosti i uklanjanje prepreka na putu ove zemlje prema Evropskoj uniji.

“Vremenski ograničeno produženje daytonskog mandata omogućit će nam da se bavimo rješavanjem eventualnih potresa nakon odluke o statusu Kosova i za vođenje reformskog procesa u zemlji sa potrebnom odlučnošću”, objašnjava visoki predstavnik i specijalni predstavnik EU.

“Moji prvi kontakti sa novim vlastima učvrstili su me u uvjerenju da na svim stranama postoji snažna volja da se

nastavi sa reformama", piše Christian Schwarz-Schilling. Pozivajući međunarodnu zajednicu da u narednim sedmicama pokaže jasan smisao za svrhu, on upozorava da je povratak na prevaziđenu intervencionističku politiku osuđen na propast.

"Jedino strpljenje i čvrsta odlučnost međunarodne zajednice će povesti Bosnu i Hercegovinu ka punoj domaćoj odgovornosti i utrti joj put prema Evropi", zaključio je visoki predstavnik i specijalni predstavnik EU.

Tekst članka visokog predstavnika/specijalnog predstavnika EU dostupan je na adresama www.ohr.int i www.eusrbih.org .